

REGIONAL NEWS

HEADLINES:-

1. Lirthei a eizawng pawl hrang hrangten naktuk Thawhtanni atanga ni 9 thleng Aizawl leh Silchar inkar a tlan chawlh tura ruahmanna an lo siam tawh chu an kaltlangpui dawn.
2. Myanmar raltlante kutzia leh mit-naute lakkhawm hna, chu district zawng zawngah July thla tawp lam khan tan a ni.
3. Kawnpui leh Sairang inkar kawngpuiah darkar 12 chhung khan Kawnpui atanga Aizawl lam pan bungraw phur lirthei 426 chhuah a ni.
4. Uttar Pradesh-a tukina lirthei chetsualna thlengah mi 11 an thi a, midang 4-in hliam an tuar bawk.

<><><>

COMMERCIAL VEHICLES

Lirthei a eizawng pawl hrang hrangte chuan naktuk Thawhtanni atanga ni 9 thleng NHW 306 leh 06 a NHIDCL leh Mizoram Sorkar in Kawngpui siam lai mek chu hnathawh a chak zawk theihna tura tlan chawlh tura ruahmanna an lo siam tawh chu an kaltlangpui dawn.

Lirthei-a eizawng pawl 24 inzawmkhawm Joint Committee hian Ningani khan Mizoram chak lakna kawngpui chu chak zawka siam a nih theih na'n August ni 4-9 thleng Vairengte leh Sairang inkar kawngah tlan rih loh an tum thu an puang tawh a. Sorkar lam pawhin thlawpin police te nen ruahmanna siampui an ni. Hemi chungchangah hian Kolasib SP chuan NH 06 kawng siam mek chu chak lehzuah a hmalak a nih theihna tura thurel bawhzuiin thupek a chhuah nghal a. Nizan dar 7 atanga Thawhtan zing dar 4:00 thleng lirthei tangkhang zawng zawng truck ke 14 nei chin hnuailam chhuah chhohna hun hawn a ni ang a. Thawhtan zing dar 4 atang chuan HMV Aizawl pan tur chu Police Checkgate hrang hrang Vairengte, Bairabi, Saiphai Police Checkgate leh Phaisen-ah te dan vek tur a ni. Kawnpui thleng kal tur erawh chu Checkgate duty ten zawh chian hmasak a dan kher a ngai dawn lo a, lirthei ke 14 nei chin chung lam tangkhang te tan Sorkarin eitur a buatsaih sak dawn bawk a ni.

Ningani, August ni 7 zan dar ruk atangin mipui nitin mamawh tuialhthei, eirawngbawl na gas leh buhfai phurtute Kawnpui leh Khamrang inkar kawngpui-ah chhuah leh tan chauh a ni ang a. Aizawl atanga chhuk te nen an tlan dan ruahmanna siam angin an tlan thei ang a, motor nawlpui erawh Inrinni August ni 9 zan dar 10:00 atangin Kawnpui leh Khamrang kawngpui-ah chhuah leh tan a ni ang a, Aizawl atanga rawn kalte nen an tlan dan ruahmanna siam angin an tlandawn ani.

Tlan chawlh puan hian bungraw phur (commercial vehicle) chiah a huam ang a. Bungraw inbanlet la tur a kal 407 chin hnuai lam Aizawl atangin Kawnpui thleng tlang kawng (Durtlang-Zanlawn-Kawnpui) lamah an tlan thei dawn a ni. Helai a tlan dan tur erawh police te remruatna angin a ni ang a, 407 truck leh a tiatpuite chu zan dar 10 leh zing dar 5 inkaarang tlang kawnga kal phal a ni a, kawng siam na'na hnathawh te, lirthei che vel te leh duty te tibuai thei zawng a tumah khawsa lo turin mitin te an ngen bawk a ni.

<><><>

ASSEMBLY

Tun thla ni 27 atanga tan tur Mizoram legislative assembly fur thutkhawm a putluh turin official resolution pakhat a lut tawh.

Assembly secretariat atanga thu dawn danin fur thutkhawm laia official resolution putluh tur hi environment, forests & climate change department atanga lut, a changtu minister Pu Lalthansanga putluh tur a ni . Zirtawpni thleng kha chuan zawhna lut a la awm lova, sorkar lam atangin dan thar siam tur emaw dan dinglai siamthat tur duan lawk emaw thehluh a la awm lo bawk. Assembly inkhawm rei zawng tur leh hun hman dan tur hi August ni 6-a business advisory committee (BAC) thukhawmin an rel dawn a. BAC hi assembly speaker Pu Lalbiakzama kaihhruai niin parliamentary affairs minister bakah legislature party tin aiawhte chu member an ni.

Eptu party-te chuan assembly inkhawm lo awm turah hian Mizoram chaklakna kawngpui chhe lutukte, GST khawn tlahniam zelte thil man sang zel te leh Aizawl khawpui Thenzawl a sawn tum chungchangte auchhuahpui an tum thu an sawi a ni.

<><><>

BIOMETRIC ENROLMENT

Myanmar raltlante kutzia leh mit-naute lakkhawm hna chu district zawng zawngah July thla tawp lam khan tan a ni.

Hriat theih chinah Myanmar leh Bangladesh atanga raltlante kutzia leh mitnaute thlalak lakkhawm hna (biometric enrolment) hi Serchhip, Lunglei, Champhai, Saitual, Khawzawl, Aizawl, Lawngtlai, Mamit, Siaha, Kolasib leh Hnahthial district-ah te July thla chawhnu lam khan tan a ni tawh a. District tinin biometric enrolment hi July thla chawhnu lam khan an tan vek a, July ni 28 leh ni 29 a tante an awm lai-in a tam ber erawh chuan July ni 30 emaw 31-ah emaw khan an tan ani. Myanmar raltlan awm tam berna, raltlan 13,586 awm ni a chhut, Champhai district-ah chuan July ni 30 khan tan mah se an khawl hmante a chian theih loh avangin an la chhinchhiah tam lo hle a. Tunkar chhovah hi chuan an kal tuan tawh an beisei. Raltlan ngah ber dawttu Lawngtlai district-ah pawh July ni 30 atang khan Chanmari Kanaan Relief camp atangin biometric enrolment hi an tan a. Tun thlengin mi 152 (mipa 45, hmeichhia 58 leh naupang 49)-te mit-naute leh kuze thla an la tawh. Lawngtlai-ah hian Myanmar raltlan bakah Bangladesh raltlan 2,000 chuang an awm mek a, an biometric data hi lak vek tura ruahman a ni a. Bangladesh raltlan hi Serchhip district a Thenzawl khawpui-ah 266 an awm bawk. Myanmar raltlan mikhual tam ber pathumna Siaha district pawhin July ni 31 khan biometric enrolment hi an tan tawh a ni.

Tun dinhmunah Mizoramah Myanmar raltlan hi 32,504 an awm mek ni a chhinchhiah a ni a. Champhai district-ah tam berin, Lawngtlai district leh Siaha district te'n an dawt a ni. Kum 2021 February ni 1-a sipai-in Myanmar sorkar thuneihna an pawng lak hnu thla khat vel atang khan Myanmar atang hian raltlan awm tanin an tam lai berin sing nga an tling a ni.

<><><>

CADC-BJP

BJP Minority Morcha a National Secretary Pu Delson Notlia chuan larsapin Chakma autonomous district council (CADC) governor's rule a a dah chu tih awm tak a ni, a ti.

Nimina BJP-in Kamalanagar a vantlang inkhawm an buatsaihah he thu hi sawiin Pu Delson Notlia chuan larsap Gen. VK Singh-a'n CADC chungchanga thutlukna a siam chu a dik a, constitution ang thlap a ni a ti a. BJP-in CADC-a sorkarna siam tum a, January thla a larsap an hmuh khan larsap chuan sorkarna siam a phalsak hma-in MDC-te chu sorkar ngeth a din theih na'n inpekna ngeth tak nei turin a chah lawk diam niin a sawi a. A hnu a sorkar ngelnghet a din theih tak si lovah khan thutlukna ngeth tak a siam ta a ni, a ti. Sorkar ngelnghet lo leh bawk tur a din leh chu larsap hian a remtih loh avangin, CADC dinglei hi thiat a, inthlan that law law mai a nih a rinawm thu a sawi bawk.

Vantlang inkhawm hi CADC district BJP president Pu Durjya Dhan Chakma-in a kaihruai a. BJP state president Dr. K. Beichhua MLA, Pu K. Hrahmo MLA leh Aizawl leh Lunglei atangin BJP hruaitu thahnem tak an tel bawk a ni.

<><><>

NQAS

Mizorama Sawrkar damdawi-in 37-in National Quality Assurance Standards (NQAS) national certificate an nei ta.

Health department hotute sawi danin NQAS nei tawh sorkar damdawi-in 37 bakah hian sorkar damdawi in 22-in state level certificate nei tawhin national certificate result nghak mek 6 an awm bawk. India rama Sawrkar damdawi in tha tehnaah Kolasib District Hospital tling thar leh a. National Health Mission (NHM) Mission Director Dr. Lily Chhakchhuak hnen atanga thu dawn danin, India rama sawrkar damdawi in tha bik tehna NQAS-ah Kolasib District Hospital chu an tling thar a, tehna-ah za zela 96 point 39 a hmu. Mizoram puma District Hospital 12 awm zingah NQAS National Certificate hmu 7 an awm ta a ni.

Health Minister Pi Lalrinpui chuan India rama damdawi-in tha bik thlan chhuah zinga Mizoram damdawi in an awm belh zel chu Mizoram tan mellung pawimawh tak a nih thu leh damdawi-in, district leh state-a thawktu zawng zawng te thawhrimna leh taimakna chhuanawm a tih thu sawiin, he'ng tehna te hi Sawrkar damdawi in pantu damlote chu a chhawr tangkai bertu tur an nih thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

VEHICLE MOVEMENT

Kawnpui leh Sairang inkar kawngpui-ah nizan dar 8 atanga vawiin chawhma dar 8 leh a chanve inkar chhung khan Kawnpui atanga Aizawl lam pan bungraw phur lirthei 426 chhuah a ni.

Aizawl lam pan , lirthei chhuahte hi eirawngbawlina gas phur 39 bakah tuialhthei phur 32 (petrol phur 13 leh diesel phur 11 bakah a phur pawlh 7 leh thlawhna tui phur truck 1) te a ni a. Khamrang leh

Mualkhang atanga Kolasib leh Assam lam pan lirthei chhuah a awm lo ani. Lirthei la tangkhang zat hi Aizawl lam pan Rengtekawnah ke 14 nei chin chunglam 74 a la awm a. Kawnpui erawh chu lirthei che vel a tawp phawt loh chuan a hriat theih lohva. Assam lam pan hi Khamrangah 45 leh Mualkhangah 255 a la tangkhang bawk a ni.

<><><>

UP ROAD ACCIDENT

Uttar Pradesh-a tukina Gonda-a lirthei chetsualna thlengah mi 11 an thi a, midang 4-in hliam an tuar bawk. Police sawi danin, Prithvinath temple tlawh tur mi 15 chuanna Bolero chu luiah a tla a, mi 4 chhanchhuah awmin ruang 11 hmuh a ni tawh bawk.

State Chief Minister Yogi Adityanath-a chuan chetsualna thleng chu pawl a tih thu sawiin thi chhungte chu cheng nuai 5-in ral an ni ang, a ti.

Prime Minister Narendra Modi-a pawhin Gonda-a vanduaia thleng chu pawl a tih thu sawiin thi chhungte hnenah tawrhpuina a hlan a, hliamte pawh dam tha leh thuai turin duhsakna a hlan a ni. Prime Minister's National Relief Fund atangin thi chhungte hnenah zangnadawmna cheng nuai 2 theuh pek an nih tur thu leh hliam tuarte hnenah cheng zing 5 theuh pek an nih tur thu a sawi bawk.

<><><>